



**REPÚBLICA DEMOCRÁTICA DE TIMÓR-LESTE
GABINETE DO PRIMEIRO MINISTRO**

**DEKLARASAUN
SUA EXELÊNSIA PRIMEIRU MINISTRU, KAY RALA
XANANA GUSMÃO IHA OKAZIAUN LANSAMENTU
RELATÓRIU KONA-BA OBJETIVUS DEZENVOLVIMENTU
MILÉNIU 2009
3 ABRIL 2009**

**Distintus Konvidadus,
Belun no maluk sira hotu,
Senhoras no Senhores,**

Ha'u sente haksolok tebes tanba ohin kalan bele mai iha ne'e hodi hato'o liafuan balu kona-ba Objetivus Dezenvolvimentu Miléniu nian iha Timór-Leste. Hanesan membru foun komunidade nasoens, Timór-Leste formalmente adopta Deklarasaun Miléniu, ne'ebé 189 paízes aprova tiha ona iha fulan Setembru 2000.

Iha Simeira Miléniu 2000, ha'u mós iha ne'ebá maibé hanesan observadór, hodi asiste rasik kometimentu ne'ebé líderes boot mundu nian sira halo, katak atu to'o tinan 2015, tenke redúz ka hamenus maka'as número ema ne'ebé sei iha pobreza absoluta laran ka moris kiak rabat-rai.

Tinan rua liu tiha, Timór-Leste hamriik hanesan Estadu soberanu nurak liu iha mundu. Restaurasaun independênsia, iha 20 Maiu 2002, marka orizonte foun ida ba ami nia povu, maibé lori mós dezafius sosiais no ekonómikus.

Hanesan Ita Boot sira mós hatene, Timór-Leste lansa nia primeiru relatório kona-ba Objetivus Dezenvolvimentu Miléniu, iha fulan Abril 2004, nebé haré tuir situasaun iha Paíz, kona-ba alvus no indikadores Objetivus Dezenvolvimentu Miléniu nian, hodi informa Povu Timór-Leste no komunidade internasional, no enkoraja halo debates i defende partes ida-ida nia hanoin.

Segundu relatório kona-ba Objetivus Dezenvolvimentu Miléniu, ne'ebé ha'u atu lansa ohin kalan, hatudu ho número, kona-ba oinsá Nasaun ne'e hetan progresu tuir Objetivus Dezenvolvimentu Miléniu to'o 2007, no identifika asoens hirak ne'ebé seidauk hala'o.

Hanesan Ita Boot sira sei haré iha relatório ne'e, Timór-Leste kontinua enfrenta dezafius ne'ebé todan tebes atu kombate pobreza no alkansa Objetivus Dezenvolvimentu Miléniu. Ami konsege halo ona progressus signifikativus relasiona ho Objetivus walu ne'e balu, maibé seidauk hetan dalan atu kumpri kometimentus sira seluk.

Tuir termus pobreza, foin halo melhorias uitoan ba povu Timór-Leste, liu-liu ba sira ne’ebé la eskola ka eskola uitoan no servisu iha agrikultura. Timór-oan serka-de ka besik rihun atus lima, mak moris iha linha pobreza nia okos, i ida ne’e reprezenta kuaze 50% husi totál populasaun.

Alvu ne’ebé determina ona iha 2004, atu hamenus populasaun ne’ebé kiak rabat-rai to’o 14%, hetok halo situasaun sai difísil liután. Labarik sira hanesan parte populasaun ne’ebé vulneráveil* liu, moris susar tebes i iha tinan 2007 rejista katak 50% mak sira nia todan ka pezu la normál, katak menus tebes. Kondisoens ekonómikas no sosiais ne’ebé la di’ak iha ami nia Paíz laran, iha implikasoens sérias ba taixa mortalidade labarik sira nian. Taixa ne’ebé hatudu katak entre rihun ida ne’ebé moris, labarik atus ida tolunulu mate, iha tinan 2004, ne’e tanba moras ne’ebé baibain hetan hanesan infesoens respiratórias ka me’ar, malária no kabun-moras.

Labarik sira to’o 74% de’it mak tama eskola primária iha 2007. Ida ne’e mós sei iha impaktu maka’as ba jerasoens aban-bain rua nian.

Maski seidauk konfirma liuhusi Levantamentu Demográfiku Saúde nian atu hala’o iha 2010, taixa mortalidade materna ka inan sira ne’ebé mate sei aas tebes no alvu atu hamenus to’o 252 ema ne’ebé mate entre 100 mil, sei sai hanesan dezafiu boot ida ba ita hotu. Relatório ne’e mós rejista katak prevalênsia ka predomíniu malária iha 2007 maka 10%, i

foin halo melhorias uitoan kona-ba tratamentu no prevensaun moras entre tinan 2001 to'o 2007. Alein-de ida ne'e, proporsaun entre feto alfabetizadas, ka hatene hakerek no lee ho mane alfabetizadus, ho tinan 15-24, konsege tuun husi 97% iha 2004 ba 93%, iha 2007.

Diskrepânsias ka buat ne'ebé la hanesan entre áreas urbanas ho rurais, karateriza ho taixa alfabetizasaun mane sira ne'ebé aas liu, sei hanesan mós dezafiu boot ida. Mane nia domíniu, tanba tradisaun, reflete momoos iha persentajen ne'ebé kiik liu, kona-ba feto sira ne'ebé hetan servisu ho saláriu, la sura sektór agrícola.

I lista ne'e sei naruk tan.

Kondisoens moris ne'ebé la di'ak, agrava tan ho efeitus aat husi krize tinan 2006 nian, liu-liu kona-ba seguransa alimentár, afeta mós ami nia esforsu atu hamenus mukit no hamlaha. Maibé nesesidade atu aborda kestoens prementes ka urjentes hirak ne'e, labele sai fali hanesan deskulpa atu hadook-an husi esforsus atu alkansa Objetivus Dezenvolvimentu Miléniu.

Ita tenke kontinua tau matan nafatin ba iha Objetivus Dezenvolvimentu Miléniu nian, enkuantu ita hasoru daudaun dezafius foun hirak ne'e.

Senhora no Senhores,

Ha'u hakarak tebes reitera ha'u nia Govenu nia kometimentu atu esforsa-an hodi buka realiza Objetivus Dezenvolvimentu Miléniu. Tanba ida ne'e mak IV Governu Konstitutionál prepara daudauk ona nia Planu Dezenvolvimentu Estratéjiku ba Nasaun ne'e, hodi ha'u mak kaer rasik, i hein katak sei kontribui atu alkansa Objetivus Dezenvolvimentu Miléniu sira ne'e.

Tanba tama ikus ona, karik Timór-Leste sei la bele atinje alvus hirak ne'e hotu, nune'e mak presiza haré didi'ak fali alvus ne'e balu, ne'ebé estabelese tiha ona iha 2004. Tetu didi'ak ami nia rekursus umanus no finanseirus agora nian, ami tenke realístiku kona-ba oinsá bele alkansa Objetivus Dezenvolvimentu Miléniu, no mós bele loke tan orizontes ka dalan atu alkansa objetivus sira seluk.

Senhoras no Senhores,

Governu hakarak agradese ba Misaun Integrada Nasoens Unidas tanba nia papél xave iha preparasaun relatório ida ne'e.

Importante liu, katak segundu Relatório kona-ba Objetivus Dezenvolvimentu Miléniu ne'e sei kontribui mós atu reforsa liután

kapasidade Diresaun Nasionál Estatísticas atu bele monitoriza no reporta kona-ba Objetivus Dezenvolvimentu Miléniu.

Senhoras ho Senhores,

Objetivus Dezenvolvimentu Miléniu foka liu ba ema no oinsá bele hadi'a sira nia moris. Objetivus hirak ne'e permite ita atu mede rasik ita nia progresus i sei bele realiza, importante mak ita hotu tenke servisu hamutuk nafatin atu Timór-Leste bele atinje duni alvus hirak ne'e tomak.

Atu remata, ha'u deklara, ofisialmente, lansamentu Relatório tinan 2009 nian kona-ba Objetivus Dezenvolvimentu Miléniu.

Obrigadu barak!

Kay Rala Xanana Gusmão.